

## आकाशवाणी जयपुर—अजमेर

## प्रादेशिक समाचार

दिनांक 29.04.2024

समय: 18.45 बजे

- उपराष्ट्रपति जगदीप धनखड़ काल एक दिन रा दौरा सारू जयपुर पधारेला ।
- राज्यपाल कलराज मिश्र कह्यो—विश्वविद्यालयां ने विद्यार्थियां ने स्थानीय साधन काम ले र खुद ने लायक बणावण सरीखा नवाचार करणा चाहिजे ।
- उत्तर पश्चिम रेलवे री फुलेरा—जोधपुर लेण न दोवड़ी बणावण रो काम पूरो व्ह्यो ।
- प्रदेश मांय गर्मी रो असर—केई ठोडां पारों 40 डिग्री सैल्सियस ने पार कीनो ।

000

उपराष्ट्रपति जगदीप धनखड़ काल जयपुर पधारेला । वां रो करीब पौने 10 बज्यां जयपुर हवाई अड्डा माथे उतरण रो कार्यक्रम है । उपराष्ट्रपति रो जयपुर मांय एक गैर—सरकारी स्कूल रो उद्घाटन अर मान्योड़ा पत्रकार रहया कर्पूर चन्द्र कुलिश री मूरत रो अनावरण करण रो कार्यक्रम है ।

0000

तकनीकी शिक्षा आम जिंदगी ने आसान बणावण री सूरत मांय ई सार्थक बण सके है । वे आज बीकानेर मांय बीकानेर तकनीकी विश्वविद्यालय रा दूजा दीक्षांत समारोह मांय बोल रहया हा । राज्यपाल कह्यो के मौजूदा दौर सूचना अर संचार प्रौद्योगिकी सागे तेजी ऊं विकास रो दौर है अर ई बगत हर विश्वविद्यालय ने ऐड़ा नवाचार करण री जरूरत है, ज्यां ऊं विद्यार्थी स्थानीय साधन काम ले र खुद ने लायक बणा सके । वे तकनीकी शिक्षा लेवण वाळा विद्यार्थियां ने नौकरी—धंधा रा बत्ता ऊं बत्ता मौका मुहैया करावण सारू उद्योगां सागे मिल र प्लेसमेंट मेळा लगावण री राय दीनी ।

-----

कार्यक्रम मांय राज्यपाल संविधान री प्रस्तावना अर मूल कर्तव्य बांच्या । दीक्षांत समारोह मांय बीआर्क, बी डिजाइन, बीटेक, एमटेक, एमबीए अर एमसीए समेत

न्यारा—न्यारा कोर्स पूरा करण वाळा 20 विद्यार्थियां ने सोना रा तमगा अर 3 हजार 171 विद्यार्थियां ने डिग्रियां दे र नवाजी ज्या।

0000

राज्यपाल आज बीकानेर मांय रेड क्रॉस री जिला इकाई रा ओहदादारां सागे बातचीत कीनी। वे रेड क्रॉस कानी ऊं चलायी जा रही जनता रा भला री योजनावां ने असरदार तरीका ऊं लागू करण माथे जोर दीनो। राज्यपाल खूनदान अर आम जन चिकित्सा सहायता सारू ई लगातार काम करण बाबत कह्यो।

0000

केंद्र, राज्यां मांय मौसमी इन्फ्लूएंजा माथे करड़ी निगराणी राख रह्यो है। अमरीका मांय न्यारी—न्यारी ठौड़ां ढांढा—ढोरां अर दूध मांय एवियन इन्फ्लूएंजा वायरस री ठा पड्यां पाछे स्वास्थ्य मंत्रालय देश मांय मौजूदा हालात रो जायजो लेवण सारू राज्यां अर केंद्र रा राज वाळा प्रदेशां सागे मीटिंग कीनी। हाल ताई देश रा किण ई हलका मांय मौसमी फ्लू रा मामलां मांय कोई असामान्य बधोतरी नी व्ही है।

0000

बांसवाड़ा रा जिला कलेक्टर डॉ. इन्द्रजीत यादव सगळा प्राथमिक स्वास्थ्य केन्द्रां माथे लू अर गर्मी रे कारण मांदा मरीजां रा ईलाज सारू सगळी व्यवस्थावां करण रा हुकम दीना है। वे आज ब्लॉक सीएमओ सागे व्ही मीटिंग मांय ऐडा मरीजां सारू अस्पतालां मांय खास कमरा बणावण रा हुकम ई दीना। कलेक्टर अस्पतालां मांय मरीजां ने गर्मी ऊं बचाव रा बारा मांय जाणकारी देवण बाबत ई कह्यो।

मीटिंग मांय मुख्य चिकित्सा अर स्वास्थ्य अधिकारी डॉ. एच.एल. ताबियार बतायो के सिकल सेल एनीमिया जांच अभियान रा तैत जिला मांय सिकल सेल एनीमिया री जांच सारू 9 लाख 22 हजार ऊं बत्ता किट मिल्या, ज्यां मांय ऊं करीब पौने 9 लाख किट ऊं जांच करी जा चुकी है। कोटा रा जिला कलेक्टर डॉ. रविन्द्र गोस्वामी ई आज स्वास्थ्य भवन रो दौरा कर र मौसमी बीमारियां रा बारा मांय खास सावचेती राखण रा हुकम दीना। वे डेंगू री जांच सारू नमूना री तादाद बधावण अर स्कूलां, कोचिंग सेन्टरां, हॉस्टलां अर कच्ची बस्तियां मांय खास अभियान चला र डेंगू ऊं बचाव सारू जतन करण बाबत कह्यो। बाड़मेर रा जिला कलेक्टर निशांत जैन आज चवा रा

सामुदायिक स्वास्थ्य केंद्र (सीएचसी) रो दौरा कर र ओपीडी री व्यवस्थावां देखी अर ज़रूरी हुकम दीना। वे सीएचसी रा अहलकारां अर कर्मचारियां ने साफ़-सफ़ाई राखण समेत न्यारा-न्यारा हुकम दीना।

000

फुलेरा-जोधपुर रेलवे लेण ने दोवड़ी करण रो काम पूरा कर लियो ज्यो है। उत्तर पश्चिम रेलवे रा मुख्य जन सम्पर्क अधिकारी कैप्टन शशि किरण आ जाणकारी दीनी। वे बतायो के फुलेरा-डेगाना बीचे 108 किलोमीटर लम्बी लेण ने दोवड़ी करण माथे 1007 करोड रुपया अर डेगाना-राई का बाग बीचे 146 किलोमीटर लम्बी लेण ने दोवड़ी करण माथे 808 करोड रुपया रो खर्चो आयो।

शशि किरण बतायो के उत्तर पश्चिम रेलवे रा रेलवे संरक्षा आयुक्त मारवाड़-नावा सिटी बीचे 9 किलोमीटर लेण रो निरीक्षण कर र ई माथे 95 किलोमीटर प्रति घंटा री रफ्तार ऊं रेलगाडियां चलावण री मंजूरी दे दीनी।

-----

000

भारतीय जनता पार्टी रो प्रदेश सोशल मीडिया विभाग केंद्रीय गृह मंत्री अमित शाह रा वीडियो ने काट-छांट कर र वायरल करण रा मामला मांय जयपुर साइबर क्राइम पुलिस थाना मांय रपट दर्ज करायी है। भाजपा प्रबुद्धजन प्रकोष्ठ रा संयोजक राजेंद्र सिंह शेखावत अर सोशल मीडिया विभाग रा सह संयोजक अजय विजयवर्गीय आ रपट दर्ज कराई। विजयवर्गीय शंका जतायी के सोशल मीडिया प्लेटफॉर्म एक्स अर फेसबुक माथे केंद्रीय गृहमंत्री अमित शाह रा वीडियो मांय छेड़-छाड़ कर र वायरल कर र एक जाति समुदाय ने उकसावण री कोशिश करी जा रही है।

00000

लारला दिनां पद्मश्री ऊं नवाज़ी ज्या अंतर्राष्ट्रीय स्तर रा बहुरूपिया कलाकार भीलवाड़ा रा रहवासी जानकीलाल भांड रो आज भीलवाड़ा पूगण परां ज़ोरदार स्वागत करी ज्यो। जानकीलाल भांड रो शहर मांय स्वागत जुलूस निकाली ज्यो। ई पाछे खबरनवीसां सागे बातचीत करता थकां भांड कह्यो के वे पूरी मेहनत ऊं लोगां रो मनोरंजन करता रेहवेला।

-----

ध्यानजोग है के लारला दिनां नई दिल्ली मांय व्ह्या जळसा मांय राष्ट्रपति द्रौपदी मुर्मू जानकी लाल भांड ने पद्मश्री ऊं नवाजा हा।

000

कोटपूतली-बहरोड़ जिला रा पावटा हलका मांय आज स्कूली बच्चां री एक बस बेकाबू व्हे र बिजली रा ट्रांसफॉर्मर ऊं टकरा ग्यी। हादसा मांय ट्रांसफॉर्मर टूट र पड़ ग्यो, हालांकि बिजली री सप्लाई बंद व्हेवण रे कारण जान रो कोई नुकसाण नी व्हयो। पुलिस गांव वाळां री मदद ऊं बच्चां ने हिफाजत सागे बस ऊं निकाळ र घर भिजवाया।

000

पाली मांय हाल ही मांय बणायी ज्यो ट्रैफिक पार्क जनता ने आवण-जावण रा कायदां रा बारा मांय जाणकारी देवण मांय मददगार साबित व्हे रह्यो है। ओ ट्रैफिक पार्क परिवहन विभाग अर ट्रैफिक पुलिस री मदद ऊं बणायी ज्यो है। और ब्यौरो म्हाणा खबरनवीस ऊं-

000

राज्य रा घणखर हलकां मांय तेज गर्मी पड़बा लागी है। केई ठौड़ां पारो 40 डिग्री सेल्सियस ऊं ऊंचो दर्ज करी ज्यो। कोटा मांय 42 अर धौलपुर मांय 41 दशमलव 3 डिग्री सेल्सियस अधिकतम तापमान दर्ज करी ज्यो। भरतपुर, वनस्थली, अलवर, अंता, बारां अर करौली मांय ई दिन री बगत तापमान 40 डिग्री सेल्सियस ने पार कर ग्यो। ई बीचे लारला 24 घंटां मांय बीकानेर, श्रीगंगानगर अर हनुमानगढ़ जिलां मांय बादळां री गाज सागे कठे-कठे हल्की बिरखा व्ही।

बीकानेर रा लूणकरणसर मांय सब ऊं बत्ती 4 मिलीमीटर बिरखा दर्ज करी ज्यी। आज ई बीकानेर संभाग मांय हल्की बिरखा रो मौसम रह्यो। मौसम केंद्र जयपुर आवता 48 घंटा मांय पारो 2 ऊं 3 डिग्री सेल्सियस उतरण रा आसार जताया है। महकमा रे मुजब 4 मई ने राज्य रा आतूणी अर उत्तराद हलकां मांय ओजू कठे-कठे बादळां री गाज सागे हल्की बिरखा रा आसार है।

000

अजमेर मांय काल एक हिंदी फ़िल्म री शूटिंग सुरु करी जावेला। ई सारु रेलवे रा डिविज़नल रेलवे मेनेजर रा दफतर ने अदालत रो रुप दियो ज्यो है। 13 मई ताई चालण वाळी ई शूटिंग ऊं रेलवे ने 27 लाख 39 हजार रुपया री आमदनी व्हेला।

राज्य मांय पांचवीं कक्षा रा विद्यार्थियां रा बोर्ड रा इम्तिहान काल सरु व्हेला। चूरु ज़िला मांय करीब 43 हज़ार विद्यार्थी आ परीक्षा देवेला। इम्तिहान सारु ज़िला मांय 768 परीक्षा केन्द्र बणायी ज्या है।